

Jax era e chajr ojroner lo que tz'ijb'ab'ir umen e Apóstol Pablo tama e grupo ajc'upesiajob' xe' turob' tama e chinam Tesalónica

1 ¹Pues nen xe' Pabloen taca e Silvano y e Timoteo war catz'ijb'a e carta era tib'a xe' jax inte' grupo ajc'upesiajox xe' turox tama e chinam Tesalónica xe' intera ib'ijnusiaj taca Catata Dios y taca Cawinquirar Jesucristo ub'an. ²Ch'amic utacarsiaj y ujiriar Catata Dios y tua' Cawinquirar Jesucristo.

E jatz'uar lo que tua' uch'amio' tin e ajmab'amb'anio' conda achecta watar e Cristo

³Pues niwermanuox, war catattz'i uc'ab'a Cadiosir tamarox iraj iraj b'an cocha uc'ani tua' cache. Porque war ach'i' ic'upesiaj tama Cadiosir axin, y war iyajta ut ib'a más y más axin. ⁴Y tamar era war catattz'iox tut e sian grupo ajc'upesiajob' iraj iraj que war ixq'uec'o ixc'upseyan tama Cadiosir motor que war inumse ib'a meyra tama e sian c'uxner. ⁵Pues chequer que erach Cadiosir conda uche juzgar porque tamar era war ixquetpa tawar tua' ixochoy tama uchinam cocha war inumse ib'a era umen taca que war ixc'upseyan tama e Cristo.

⁶Pues tawar Cadiosir xe' c'ani uyajc'u uyeror tunor tin e war uchiox inumse ib'a era, ⁷y tua' axin uyajc'ox ujiriar watar e día cocha war inumse ib'a meyra era, y b'an tua' axin uyajc'on non ub'an tama e día conda achecta watar Cawinquirar Jesús tut e q'uin macuir uwarar e c'ajc taca uyangelob' xe' meyra ayan uc'otorer. ⁸Jaxir watar taca inte' nuxi jatz'uar tua' uwatz'i tunor tin e machi unatob' chi Cadiosir y tunor tin e machi ac'upseyanob' tut uyojroner Cawinquirar Jesús tama e corpesiaj. ⁹Jaxirob' tua' axin ajajtz'ob' taca inte' nuxi tijresiaj xe' machi tua' ac'apa, y uc'ani tua' ajujrob' najtir tut Cawinquirar y najtir tut e nuxi tawarer lo que ayan tama uc'otorer Cawinquirar. ¹⁰Y b'an

tua' anumuy tama e día conda achecta watar Cawinquirar tua' atajttz'a umen tunor tin e tuob' y conda tua' atzay e'rna umen tunor tin e war ac'upseyanob' tamar. Y cocha nox c'apa ich'ami tunor uyojroner e Dios lo que cay cachecs tuot, nox ub'an tua' ixquetpa taca tunor e sian ajc'upesajob' era.

¹¹Pues tamar era war cac'ajti taca e Dios tamarox iraj iraj que jaxir tua' axin uyustes tunor iweroj este que ixc'otoy ixquetpa erach inyajrer tamar jaxir porque tamar era sicb'ab'irox umener. Y war cac'ajti taca e Dios ub'an que jaxir tua' utacriox meyra taca uc'otorer tua' ixajc'una tunor lo que imb'utz lo que war iyusre ich'ami tua', y que Cadiosir tua' axin utacriox taca tunor lo que war iche umen que war ixc'upseyan tamar. ¹²Pues tamar era c'ani axin atajttz'a meyra uc'ab'a Cawinquirar Jesús tamarox, y nox ub'an c'ani ixixin ixtajttz'a umen e Dios umen que meyra ayan utacarsiaj Cadiosir y tua' Cawinquirar Jesucristo ub'an.

Ayan cora checsuyaj tamar uyopar Cawinquirar

2 ¹Pues entonces niwermanuox, tama e tiempo conda c'ani achecta watar Cawinquirar Jesucristo otronyajr conda c'ani caquetpa morojseb'iron tacar, pues ayan lo que c'ani cawareox tamar, ²porque jay ayan tin e ayopa tiut xe' uyareox que yopix Cawinquirar, ira iwacta ib'a tua' apocpa iwalma wacchetaca umen inte' ojroner cocha era, y ira iwacta ib'a tua' ixb'ajc'usena porque majax b'an. Y motor que ixarob'na que jax inte' ojroner xe' ajc'una umen e Dios o jay ich'ami inte' carta xe' tz'ijb'na ani camener xe' che que yopix Cawinquirar, ³ira iwacta ib'a tua' ixmajresna porque majax b'an. Pues c'ani asutpa watar Cawinquirar Jesucristo otronyajr, pero b'ajxan c'ani ac'otoy e día conda meyra ajc'upesajob' tua' axin uyactob' ub'ir Cawinquirar. Y de allí c'ani achecta inte' winic xe' tua' e mab'amb'anir inyajrer xe' jax uman e diablo, pero jaxir aquetpa tua' ajujra axin tama e c'ajc watar e día. ⁴E winic tua' e mab'amb'anir era c'ani axin uxejb'e ut tunor lo que axin ojytzna ut umen e gente y axin uxejb'e ut Cadiosir ub'an. Y jaxir tua' axin uch'ijse ub'a tujor tunor era y axin uturb'a uturtar macuir utemplo e Dios lo que ayan tama e chinam Jerusalem tua' ojytzna ut umen e gente este que axin uche ub'a que jaxir jax ani e Dios.

⁵Pues ¿machi ca c'ar imener que cay inwareox tama tunor era conda turento tacarox? ⁶Y nox war inata chi xe' war uquete uwab'u e winic tua' e mab'amb'anir era tua' machi achectesna este que ac'otoy e hora tua'. ⁷Pues warix acay tunor lo que war ub'ijnu uche e winic tua' e mab'amb'anir era motor que mucurto ticoit coner, ajtaquix aquetpa tua' aloq'uesna tin e war uquete uwab'u e winic era tua' machi uche tunor e mab'amb'anir lo que c'anix ani uche. ⁸Pero watar e día axin achectesna e winic era xe' tua' e mab'amb'anir y entonces Cawinquirar Jesús c'ani axin uchamse tamar taca umusic y axin utijres tamar taca uwarar utawarer tama e hora conda achecta watar. ⁹Pero conda ne mato achecta watar Cawinquirar, c'ani achecta watar e winic xe' tua' e mab'amb'anir taca uc'otorer e

Satanás. Y jaxir tua' umajres e gente taca e sian milagro y taca e sian seña y taca e sian chectesaj lo que c'ani uc'ampes tua' uche ac'upseyanob' e gente que erach ani tunor era. ¹⁰Y jaxir c'ani uc'ampes meyra sian mab'amb'anir tua' umajres e gente xe' turix tua' asatpob', cocha jaxirob' machi cay uch'amio' lo que erach y nien machi uyajta ut lo que erach tua' uyub'i acorpesnob'. ¹¹Y tamar era cocha matuc'a uc'anio'b' xe' erach, e Dios tua' uyeb'ta watar inte' nuxi majresaj ojroner tua' uche ac'upseyanob' tamar lo que majax erach. ¹²Y b'an tua' anumuy tua' aquetpob' satrem tunor tin e machi uc'ani ac'upseyanob' tamar lo que erach porque jaxirob' war atzayob' uchiob' ajtaca lo que mab'amb'an.

Sicb'ab'irox tua' ixcorpesna

¹³Pues entonces niwermanuox xe' yajtanb'irox umen Cawinquirar, c'ani catattz'i uc'ab'a e Dios tamarox, porque e Dios cay usicb'ox conda ne mato achen a ani or e rum era tua' ucorpesox. Pues usicb'ox tua' ixquetpa b'ajxan tua' ixcorpesna umen upatnar Unawalir e Dios conda cay uyustes tunor iwirnar y umen que cay c'upseyanox tamar lo que erach. ¹⁴Pues Cadiosir upejcox tua' ix'upseyan tamar lo que erach conda cay cachescu uyojroner e Dios tama e corpesaj tiut. Y jaxir upejcox ub'an tua' uyub'iox ich'ami tunor utawarer Cawinquirar Jesucristo.

¹⁵Entonces niwermanuox, q'uec'ojsenic ib'a tama ub'ir e Dios y ira inajpes e canseyaj lo que cay cachescu tiut conda turonto tacarox y lo que cay catz'ijb'a tama inte' carta tib'a. ¹⁶Pues e Jesucristo xe' jax Cawinquirar taca Catata Dios war uyajta coit meyra y tacar utacarsaj war ut'ab'se cawalma inyajrer y war uyaje'on lo que war cacojco tua' cach'ami tua' jaxir. ¹⁷Que Cawinquirar Jesucristo taca Catata Dios axin ut'ab'se iwalma y axin uq'uec'ojsiox tua' aloc'oy imb'utz tunor lo que iche y tunor lo que iware.

C'ajtnic taca e Dios tamaron

3 ¹Pues entonces niwermanuox, c'ajtnic taca e Dios tamaron que uyojroner Cawinquirar tama e corpesaj axin ac'otoy tama tunor or e rum, y que tic taca tia' ac'otoy e ojroner era que c'ani ach'ajma taca inte' nuxi tzayer b'an cocha numuy tacarox. ²Y c'ajtnic taca e Dios ub'an tua' machi uchionob' canumse cab'a e mab'amb'an winicob' xe' calapir uchiob', porque chequer que majax tunor xe' war ac'upseyanob' tama Cawinquirar. ³Pero erach Cawinquirar xe' c'ani uq'uec'ojsiox tua' ixxana tama ub'ir jaxir y xe' c'ani ucojcox tua' machi xpijchna umen e diablo. ⁴Pues non era war cacojco tama Cawinquirar que nox war ix'upseyan tut tunor lo que cay cawareox y que b'an tua' iche iraj iraj ub'an. ⁵Pues Cawinquirar ub'ijresicox tua' iyajta ut e inmojr b'an cocha war uche Cadiosir y que ub'ijresicox tua' iwacta anumuy b'an taca lo que war inumse ib'a era b'an cocha cay uche e Cristo.

Tunoron uc'ani tua' capatna

⁶Pues entonces niwermanuox, ayan lo que c'ani cawareox era tamar uc'ab'a Cawinquirar Jesucristo, que ira inut'i ib'a taca inte' hermano xe' machi c'ani apatna y xe' machi c'ani ob'ian tut e canseyaj lo que cay ich'ami tamaron. ⁷Pues nox inata ixto cocha uc'ani tua' ixturuan tua' iche b'an cocha cache non. Porque non machi turuanon b'an taca conda turon tacarox sino que cay patnon iraj iraj. ⁸Y ma tia' cay wesenon b'an taca sino que ixion catoyi tunor lo que cay cac'uxi. Y tamar era cay patnon este que c'oyon tama e día y tama acb'ar ub'an tua' machi ac'axi tama ijor nox tunor lo que ixion casati tamaron. ⁹Pues erer ani cac'ajti e tacarsiaj tib'a b'an cocha cay cacansiox, pero machi cache umen que war cab'ijnu tua' caquetpa b'an cocha inte' chequerir tiut tua' uyub'iox iwira tuc'a uc'ani tua' iche tama Cawinquirar. ¹⁰Porque conda turonto tacarox cawareox que tin e machi apatna machi tua' awe' ub'an. ¹¹Pues war cawareox cocha era umen que cay coyb'i que ayan tijam tin e taca turob' y xe' machi war apatnob', ajtaca war unumsiob' e tiempo tama e sian ojroner lo que war uchiob' upater otronte'. ¹²Entonces c'ani caware tamar uc'ab'a Cawinquirar Jesucristo tunor tin e machi war apatnob' que turicob' tz'ustaca y que chic patnacob' tua' utajwiob' e tumin tua' uyub'i umaniob' lo que c'ani uc'uxiob'.

¹³Pues cawermanuox, ira ixc'oy iche lo que imb'utz tut e Dios. ¹⁴Pero jay ayan tin e machi c'ani ac'upseyanob' tut lo que war catz'ijb'a tib'a era, ch'ujcunic iwira chi y ira inut'i ib'a tacar tua' ayopa e sub'ar tamar. ¹⁵Pero ira ib'ijnu que inte' cocha era tua' aquetpa b'an cocha inte' xe' war aq'uijna uwiret, sino que cansenic lo que erer uche b'an cocha iche taca inte' iwet ajc'upesajir.

E chojb'esiaj

¹⁶Que Cawinquirar xe' tua' e jiriar uyajq'uicox e jiriar iraj iraj tic taca tia' chicox. Cawinquirar quetpac tacarox inte' intiox.

¹⁷Pues nen xe' Pabloen war intz'ijb'a inte' c'ajpesiaj tib'a taca nic'ab' b'an cocha inche iraj iraj conda inweb'ta axin inte' carta cocha era.

¹⁸Cawinquirar Jesucristo uwech'ic utacarsiaj tama ijor tunorox. Tara ac'apa tunor niwojroner, che e Pablo.